

Guts durch Männer/ vnd lernet viel Künste/ damit sie sich selber nehret/ ihr trincken ist viel nüchtern/ vnd leidet viel schmerzen der Weiblichen Kranckheiten / vnd Fluß/ ein Hund oder ander Thier wird sie lesen oder zeichnen/ ihr werden angezeiget zween ehelicher Männer/ mit denen sie Glück vnd Ehr erlangen wird. Sie wird einen Fall thun von oben herab/ auch leiden Kranckheit des Magens/ durch hitzige Fieber/ ihr Glück vnd Unglück schickt sich/ wie oben gemeldet.

Jungfraw.

In Knäblein geboren zwischen dem 15. Tage Augusti vnd 14. Tag Herbstmonats/ ist der Natur vnd Eigenschafft des Zeichens Jungfrawen/ der Complexion Mercurij, ein *Melancholicus*, kalt / trucken / Weibisch / gemeiner Sinn/ hübschen Haupt vnd Angesichts/ guter form vnd gestalt / kurze Stirn / schlechte Nasen / scharffes Gesicht / langges behendes Leibes / schmale Lenden / lange Schenckel vnd Füße/ geistlicher Sitten / scheint güetig zu seyn / vnd ist doch neidisch/ schöner Gebärden / eines jehen Zorns / Rathgeber/ Flug/ findiger scharffer worte/ Erbar/ rein / vnsteten Muths/ vnd wird leichtlich zum guten oder bösen bewegt/ wozu man wil / vnd gleubet schier/ was man ihm sagt / sihet oder höret gerne schande oder schimpff / hat hin vnd her schiessende Augen/ vnd hat alle die lieb/ so nicht vnter diesem Zeichen geboren sind / er wird vnter seinen Brüdern der aller verdrosset / vberlebt auch Vater vnd Mutter / verheißt viel / vnd helt wenig/ beschawet gerne frembde Lande / auff daß er könne darvon sagen. Er trawret offte für ander Leute Armuth/ die